

San Franciscu d'Assisi



O Biatu Franciscu duci e beddu,
quannu pensu chi fusti criticatu,
offisu, scuncicatu, rimuttatu
e giudicatu senza ciriveddu,

quannu pensu chi fusti sinnacàtu
picchi dasti li beni e lu casteddu
pi diventari sulu un puvureddu,
nun mi lamentu chiù di lu me statu.

Ora m'addugnu chi putenza e beni
nun sudisfanu l'animu e lu cori;
la vita, senza Fidi, sicca e mori
e li tesori abbrazzanu li peni.

L'offisi chi ti ficiru, di sali,
ora su' divintati Rosi e Ciuri,
e lu to' Regnu è chiddu di l'Amuri
chi rènniri vulivi universali.

Si di ssu Munti guardu ntunnu-ntunnu,
in un mari sprofunddu di poesia:
Assisi, terra amata, chi pi Tia
l'anima è divintata di stu munnu.

Un munnu a la riversa, turmintatu,
chi non firria chiù, ma ruzzulia,
di la Buntà e la Fidi distaccatu,
malu vistutu di democrazia.

Una democrazia senza rispettu,
chi nun canusci sensu e proporzioni,
c'avi pi stemma dd'anticu difettu
di guvnrari senza cunvinzioni.

Una democrazia, c'un'è la toi;
la toi fu di rinunzi e di patiri
dunni quattru Fratelli foru Eroï
di la buntà, la fidi e lu duviri.

L'aceddi di lu celu si ni vannu,
e li pisci si pighianu lu fora,
lu suspiru di l'omu è sulu affannu,
ed lu nun sacciu comu campa ancora!

L'ACQUA, c'amasti cu tuttu lu cori,
e chi lassasti frisca e immacolata,
scinni versu lu mari e a mari mori,
di chista società, murtificata.

Li pàssari, chi mbrazza ti pusàru,
ora scàppanu tutti spavintati.
Li ciuri di li campi, abbannunati,
abbuccàru la testa e ni siccàru.

Senza cridiri a Tia nun si po' campari
picchi fusti l'esempiu, lu chiù duci
dunni la società vitti la luci
chi a nui, spirduti, sta pi tracuddari.

Omù dispersu ni sta matri terra,
Franciscu po' turnari, si lu voi!
Nui vulemu la paci e no la guerra
e lu gran Beni di lu cori soi.

FRANCISCU, di ssu Munti cunsacratu
benedici mazziornu e trumuntana
ed abbrazza stu Populu assitatu
di Giustizia e di Fidi franciscana.

Vincenzo Licata